

聖旨是卽行文書去欽此欽遵移咨到臣除行  
湖廣都布按三司等衙門將都指揮王英  
叅議劉子鍾僉事郁文博知府干璠指揮  
孫能千戶曹宗李全李俊百戶曹政韓忠  
尹釗俸給俱自成化元年十一月初七日  
住支今做爲事官上緊協力殺賊外行據  
分巡荆南道僉事黃謹呈據襄陽府呈准  
本府通判趙茂牒准本府牒抄蒙荆南道  
案驗會同襄陽衛委官指揮僉事薛通親

詣南漳房縣查勘行據房縣申據原口捕盜老人向友恭并民壯地方知見人等三名等供結得先前強賊蔣虎等三十三名在河南南陽府打劫民人李穩家財蒙州守禦千戶所差委應捕百戶周閻帶領旗軍緝至襄陽府穀城縣會合本縣應捕委官醫學訓科李守忠督令火甲人等押帶原首人孫興等指引到金牛山揆捉賊首蔣龍等各賊知覺糾合強賊劉長孫等

拒敵將委官李守忠打傷被賊搶去騎坐馬匹及將應捕軍餘郝端陳亮殺死各賊逃往陝西漢中府洵陽縣去訖後被守備漢中等處都指揮吳榮官軍追趕於成化元年七月內復回襄陽府竹山縣地向文峪河搶劫民人任皮家財該縣委陰陽訓術素璧帶領總甲盛謙等與和尚招師一同向前與賊對敵內火夫柳廣等用藥箭將賊射死三人中傷五六人各賊發狠向

前將原帶火夫聶景等并招師一十名殺傷身死本縣申府轉達右副都御史王處行委襄陽府知府干璠襄陽衛指揮孫能帶領官軍民壯人等協同前去被劫處所緝捕前賊當有捕盜老人向友恭等走報有前賊在湯頭關駐劄指揮孫能不候知府干璠到來商議就行輕率百戶曹政韓忠尹釗房縣千戶所應捕千戶曹宗各帶旗軍拘同老人向友恭帶領火夫人等

前去捕至馬欄鋪與賊對敵各不奮勇殺賊被賊殺死旗軍鄭信等一十名民夫五名被傷旗軍將所執軍器盡行丟棄各散有知府干璠委的未到不曾策應本年八月二十三日前賊復到房縣城外攻城知府干璠指揮孫能并本所副千戶李全曹忠等右所百戶曹政韓忠尹釗因見賊勢兇惡關閉城門率領官軍民壯在於城上用火鎗弓箭射傷強賊五六人被賊在於

城外劫掠財物燒毀軍民馮子智等一十七家房屋至晚各賊退散去訖等因行間隨據均州守禦千戶所申准本所副千戶李俊關奉衛帖該抄蒙右副都御史王案驗備行本職點選精壯軍餘二百名各帶鋒利器械聽候本衛指揮孫能親臨調用依准點選過旗軍王槐等二百名於成化元年八月十九日跟隨本衛指揮使孫能前到地名外朝山據本所原差探信小

旗時常等報稱強賊在於後川屯地名月竹關團營宿歇轉往站川去訖當蒙指揮孫能分撥本職與同千戶高嶽周鼎姜禎旗軍蔣泰等一百五十三員名分路徑往月竹關追捕內將旗軍鄭信等五十名跟隨指揮使孫能前往房縣截捕前賊與賊對敵被賊殺死旗軍鄭信等五名其千戶李俊在於月竹關捕賊未曾到於房縣又據南漳縣申准原委捕盜陰陽訓術羅道

呈查得成化元年十月初四日強賊到於本縣之時比有知府干璠先奉贊理軍務巡撫湖廣都察院左僉都御史王儉劄付爲水患事坐取回府踏勘災傷賑濟饑民指揮使孫能在於中途舊縣鋪駐劄不曾到縣房山千戶所千戶曹宗李全均州千戶所千戶李俊彼時俱各回所未曾到縣止有襄陽衛百戶曹政韓忠尹釗等在於本縣領旗軍人等與賊對敵被賊殺死本

縣并穀城縣民壯劉原等五名燒毀民人徐剛等一十五家房屋劫去在監輕重囚犯鄒政等八名口搶去民人單政等家馬六匹擄去民人鍾魁等家男女四名口及查得前項強賊在於房縣南漳等處殺傷官軍攻劫縣治之時有原委都指揮王英回司管事叅議劉子鍾在均州撫民僉事郁文博蒙巡按湖廣監察御史王璣取回科場去訖俱各不在不曾嚴督各官殺賊

以致賊人將官軍民壯殺死等因取具該縣所官吏委官民壯火甲并原日對敵處所當地知見人等結狀回繳得此案照先准本府牒該承准荆南道故牒奉右副都御史王 劄付前事備由移牒到職會同襄陽衛指揮蔣 通行查勘去後今照前因擬合會案各另回報爲此今將會勘過緣由并取具各該官吏等結狀移牒本府轉繳到道據此案照先節奉右副都御史

王 劄付案驗爲強賊在山拒捕殺傷軍民等事查勘各官悞事實情及轉行鎮守湖廣總兵官都督同知李震分守荆襄等處右叅將都指揮王信通查各官有無功勤去後今據繳報行間續又節據襄陽府呈抄蒙分守荆襄等處右叅將都指揮王信案驗開查先於成化元年十一月二十一日本職分哨督統官軍前到房縣進兵勦寇間十二月初九日強賊在於門樓頭

駐劄與同僉事郁文博設意使令官軍前去劫營殺死賊人一百五十名內生擒賊人四十四名器械二十八件官軍全勝回還有功成化二年正月二十三日忽有賊來房縣本職督同本官領軍在於城東外與賊對敵殺退賊衆奪回賊馬四匹器械三十二件至二十四日二十五日賊衆擁來攻城連日分投在於城上戰敵殺退賊衆殺死賊人五十五名保全孤城後有大

軍進兵本官隨軍僉運糧儲節次勤勞有功千戶李全李俊曹宗於成化二年正月二十二日賊衆擁來房縣攻城之時連日在於城上與賊對敵殺退賊衆保全城池及奉鎮守湖廣總兵官都督同知李震劄付查得成化元年十一月十四日攻進隘門關大木廠等處殺獲有功官軍內有都指揮僉事王英擒斬賊級二名顯右叅議劉子鍾生擒賊人一名知府干璠生擒賊

人二名指揮孫能斬獲首級一顆百戶尹  
釗曹政韓忠俱係當先奪關等因及照得  
自成化二年二月以來蒙

欽差總兵官進兵勦殺賊寇之時有都指揮王  
英叅議劉子鍾在於穀城縣哨護糧道知  
府干璠在南漳縣理辦糧料指揮孫能百  
戶曹政韓忠尹釗俱在南漳縣守城各有  
勤勞等因具結呈繳到臣叅照都指揮王  
英叅議劉子鍾僉事郁文博知府干璠指

揮孫能千戶曹宗李全李俊百戶曹政輔  
忠尹釗前項悞事實情既已查勘明白於  
法固當究治緣賊情今已寧息各官頗有  
前項功勤兼且悞事之罪犯在成化元年  
十一月二十七日

大赦以前緣係該部奏奉

欽依候前賊勦捕畢日將各官前項悞事實情  
并有無殺賊功勤緣由通行查勘明白具  
奏定奪事理未敢擅便具題又該右副都



御史王 題爲緊急賊情事先准兵部咨  
該巡按湖廣監察御史王瀛等題臣到襄  
陽府南漳縣訪得都指揮陳杲成化二年  
二月初七日領軍到於資坪豎立排柵初  
八日果有賊人前來有陳杲預先怯弱分  
付頭目不許出敵將官軍民快俱令在於  
排柵內以待賊人到來方用火器弓弩擊  
殺有賊首石和尚等止令數十賊人先來  
誘敵指揮梁昱不識詭計信以爲實獨率

二百餘人渡水迎殺賊人因見出戰軍少  
四下突出將梁昱所領軍快人等圍住陳  
杲見事危迫纔方發兵策應以致被賊殺  
擄前項軍快人等數多得此叅照都指揮  
同知陳杲統領官軍快手二千員名遇賊  
不能奮勇一戰退縮怯弱而力主固守之  
謀指揮僉事梁昱不能筭料賊情獨率二  
百餘人輕進易敵而獨特血氣之勇號令  
旣不歸一行事又相矛盾以致賊人殺死

軍人快手數多所據陳景梁昱等俱合查  
提問罪等因具題該通政使司官奏奉

聖旨該衙門知道欽此該兵科抄出送司案呈  
到部參照巡按湖廣監察御史王瀛等奏  
稱都指揮同知陳景指揮僉事梁昱等俱  
合查提問罪緣由緣都指揮同知陳景指  
揮僉事梁昱并各該領軍官員既有前項  
懷奸退縮并輕進易敵失機悞事情由於  
法合當究治但今荆襄賊寇猖獗正係用

人領兵勦殺之際若將各官就便提問誠  
恐缺人領兵因而悞事未便合無行移都  
御史王 着令各官住俸做爲事人在彼  
領軍上緊協力勦殺前賊候賊情寧息之  
日將各官失機悞事實情并有無殺賊功  
勤緣由通行查勘明白具奏定奪等因具  
題成化二年三月二十七日本部尚書王  
復等奏奉

聖旨是欽此欽遵移咨到 臣除行湖廣按察司

轉行湖廣都司將都指揮同知陳杲辰州  
衛指揮僉事梁昱并各該領軍頭目安六  
衛指揮同知黃琛荊州右衛指揮使秦昭  
武昌衛指揮同知李隆武昌護衛指揮僉  
事于鏞俸給住支令做爲事官協力殺賊  
外行據分巡荆南道僉事黃謹呈據委官  
襄陽府襄陽縣主簿曾忠呈抄蒙本道紙  
牌該奉臣劄付前事行淮南漳縣牒拘得  
資坪地方里老吳敬等到職審據各人供

稱成化二年二月初五日有徒步尤繼海  
等報有強賊前來攻劫南漳縣當蒙太監  
總兵都御史等官議調都指揮陳杲等統  
領官軍二千員名於二月初七日出哨到  
於資坪河北駐劄豎立排柵爲營初八日  
果有賊人前來委的都指揮陳杲預先分  
付指揮黃琛秦昭李隆于鏞等不許輕易  
出敵只在排柵內待賊到來方用火器弓  
弩擊殺有賊首石和尚等先令三十餘賊

從河南岸前來誘敵陳杲黃琛等俱在營內不敢出戰有指揮梁昱不能料敵獨令官軍二百員名渡水前去逆戰隨有快手總甲許真統領快手八十名前去策應賊人因見出戰軍快數少舉衆前來四面夾攻軍快奮勇殺死賊人約有四十餘名不曾斬得首級奪回賊馬四匹被賊殺死快手二十六名軍人十名後太監總兵都御史等官又差都指揮蔡昇統率官軍二千

員名前去策應賊勢稍却本日晚收軍回營當夜賊人復來劫營節被官軍用弩箭石炮打退初九日早太監總兵都御史等官又差指揮蔡英統領官軍一千員名前去應援舉放信砲鼓噪而進有賊首石和尚等聞知纔方向前詐說願投降等語隨即投散入山去訖今蒙查勘所供是實據供尤恐不的又據拘鄉導陳華等到官再三研審覆實相同等因呈報到道案照先

奉右副都御史王 劄付准兵部咨前事  
仰本職卽照開去爲事官員從實查勘原  
先失機悞事實情有無殺賊功勤緣由依  
奉已經行委本官查勘各官悞事實情并  
行把總安六衛指揮僉事蔡英查勘各官  
有無功勤去後今據前因行間又據委官  
指揮蔡英呈查得指揮梁昱于鏞李隆各  
於月日不等前進白洛河及格堦坡等處  
俱各斬首三功數內秦昭亦係督軍殺賊

之數黃琛進哨之時蒙委守備南漳并資  
坪等處往來防護搭架橋梁開修道路都  
指揮同知陳杲率領官軍自南漳起至潭  
頭坪擺堡往來哨護糧料擒獲賊人一名  
有功等因爲照都指揮陳杲指揮梁昱于  
鏞李隆生擒賊犯并斬獲首級中間恐有  
不的行據襄陽府呈抄蒙紀功監察御史  
孫珂鄧本端案驗查得辰州衛指揮梁昱  
先於白洛河斬獲首級一顆後於格堦坡

斬獲首級二顆及武昌衛指揮于鏞斬獲首級各三顆俱驗明白皆准功次都指揮陳杲擒獲賊人一名李友俱各有功回報到道備呈到臣參照都指揮陳杲指揮梁昱于鏞李隆秦昭黃琛前項失機悞事實情既已查勘明白論法固當究治緣今賊情寧息數內陳杲梁昱于鏞李隆已有前項生擒斬首功次秦昭亦曾督軍殺賊黃琛亦曾守備南漳搭架橋梁開修道路頗

効勤勞共成殺賊之功緣係該奉

欽依候賊情寧息之日將各失機悞事實情并有無殺賊功勤緣由通行查勘明白具奏定奪事理未敢擅便具題成化二年十一月初八日該通政司官於

奉天門奏奉

聖旨該衙門知道欽此欽遵抄出送司案呈到部參照右副都御史王奏稱都指揮王英擒斬賊級二名顆參議劉子鍾生擒一

名知府干璠生擒二名指揮孫能斬首一  
顆百戶尹釗曹政韓忠俱當先奪關愈事  
郁文博設意使令官軍劫營殺死賊人一  
百五十名生擒賊人一十四人千戶李全  
李俊曹宗與賊對敵保全城池各官頗有  
功勤兼且悞事之罪犯在革前及稱都指  
揮等官陳杲生擒賊人一名梁昱李隆丁  
鏞俱斬獲首級三顆秦昭亦曾督軍殺賊  
黃琛亦曾守備南漳搭架橋梁開修道路

頗効勤勞共成殺賊之功一節緣各官先  
因失機悞事已該本部節次議奏今其任  
俸做爲事官戴罪殺賊令副都御史王  
候賊平之日將各官失機悞事實情并有  
無殺賊功勤查勘明白通行具奏定奪今  
彼處地方旣已寧息其右副都御史王  
自合照依比先節次奉

欽依內事理將各官查勘見某人有何功蹟堪  
以贖罪某人應該究問却乃將奪關并與

賊對敵及督軍殺賊開修道路等項一槩  
作殺賊功勤朦朧具奏合無本部仍行本  
官令其共同巡按監察御史將各官逐一  
查勘要見某人功過相準相應寬貸某人  
罪重功微相應究問再行查勘明白各另  
具奏定奪等因具題成化二年十一月十  
五日本部右侍郎李震等於

奉天門奏奉

聖旨是欽此欽遵行移到臣查得兵部前項奏

內先一次止稱合無行移都御史王若  
令各官住俸做爲事官上緊協力殺賊候  
前賊勦捕畢日將各官前項悞事實情并  
有無殺賊功勤緣由通行查勘明白具奏  
定奪後一次止稱合無行移都御史王若  
着令各官住俸做爲事官在彼領軍勦賊  
候賊情寧息之日將各失機悞事實情并  
有無殺賊功勤緣由通行查勘明白具奏  
定奪別無令臣查勘各官某人有何功蹟



堪以贖罪某人應該究問緣由况賞罰乃人君之大柄非臣下所敢專兵部原奉內不曾令臣如此擬奏臣豈敢輕易妄擬以此臣止照

欽依內事理將各官失機悞事實情并數內王英劉子鍾陳杲梁昱等獲到功次及尹釗等當先奪關秦昭督軍殺賊黃琛開修道路等項勤勞具奏取自

上裁今該前因欽遵公同巡按湖廣監察御史王璽查得指揮孫能委的不候知府干璠到來商議輕率百戶曹政韓忠尹釗千戶曹宗各帶旗軍火夫人等捕至房縣馬欄鋪與賊對敵各不奮勇殺賊被賊殺死旗軍鄭信等一十名民夫五名彼時知府干璠指揮孫能千戶李全曹宗百戶曹政韓忠尹釗委因賊勢兇惡關閉城門率領官軍民壯在於城上用火鎗弓箭射傷強賊五六人被賊在於城外劫掠財物燒毀軍

民馮子智等一十七家房屋至晚退散去  
訖千戶李俊委在月竹關捕賊不會到於  
房縣其後強賊到南漳之時知府干璠委  
蒙巡撫僉都御史王儉取回路勘災傷賑  
濟饑民指揮孫能委在中途舊縣鋪駐劄  
不會到縣千戶曹宗李全李俊彼時各俱  
回所止有百戶曹政韓忠尹釗在彼領軍  
與賊對敵被賊殺死民壯劉原等五名燒  
毀民人徐剛等一十五家房屋劫去在監

囚犯鄒政等八名口搶去民人單政等家  
馬匹擄去民人鍾魁等家男女四名口及  
勘得前項強賊在於房縣南漳等處殺傷  
官軍攻劫縣治之時有原委都指揮王英  
回司管事叅議劉子鍾在均州撫民僉事  
郁文博蒙巡按監察御史王棨取回科場  
去訖俱各不會督軍殺賊以致賊人殺死  
官軍民壯其後官軍攻隘門關等處都指  
揮僉事王英擒斬賊級二名顆右叅議劉

子鍾生擒賊人一名知府干璠生擒賊人  
二名指揮孫能斬獲首級一顆僉事郁文  
博在於房縣設意使令官軍前去劫營殺  
死賊人一百五十名生擒賊人一十四名  
又督官軍與賊對敵殺退賊衆奪獲賊馬  
殺死賊人五十五名千戶李全李俊曹宗  
百戶尹釗曹政韓忠委與賊人對敵當先  
奪關曾効勤勞又查都指揮陳杲等統軍  
到於資坪遇賊委的陳杲同指揮黃琛奏

昭李隆于鏞等俱在營內不敢出戰有指  
揮梁昱不能料敵獨領官軍二百名渡水  
前去逆戰隨有快手總甲許真統領快手  
八十名前去策應共殺死賊人約有四十  
餘名被賊殺死軍快二十六名其後指揮  
梁昱于鏞李隆在於白洛河等處俱各斬  
首三功都指揮同知陳杲領軍擺堡哨護  
糧料擒獲賊人一名指揮秦昭委的督軍  
殺賊指揮黃琛委的守備南漳開修道路

曾効勤勞看得都指揮黃英陳杲叅議劉子鍾僉事郁文博知府干璠指揮孫能梁昱于鏞李隆既有前項殺賊之功堪以贖日前悞事之罪相應寬貸指揮秦昭黃琛千戶李全李俊曹宗百戶尹釗韓忠曹政罪重功微俱該究問緣數內李全李俊曹宗尹釗韓忠曹政俱犯在成化元年十一月二十七日

大赦以前緣係

欽依再問查勘明白具奏定奪事理未敢擅便具本謹題

繳撫治流民 勅諭奏狀

成化三年二月二十三日節該欽奉

勅諭今特命爾巡撫河南地方欽此照得先奉勅諭命臣撫治南陽襄陽荊州三府流民已經欽遵督同司府州縣衛所官吏委官取勘撫治無田地者區畫撥與無牛耕者措辦分給無衣食者設法賑濟願入籍者編成

里甲願復業者省令秋成回還及將編過里甲安插過戶口撥過田地給過牛種賑濟并願復業人戶數目具

題外去年賊平之後又該督令各該委官將被賊驚散者招撫復業詐冒鄉貫漏報戶口等項者取勘明白應改正者就與改正應附籍者仍編里甲應發遣者照例發遣去後今該欽奉前因除欽遵及行湖廣布政司撫民叅議劉子鍾徑自督屬委官撫

治外今將原奉撫治流民

勅諭 進繳謹具奏 聞

計繳

勅諭一道

陞左副都御史謝 恩奏狀

成化三年三月十五日准本院咨爲功次事該兵部題節該欽奉

聖旨是王恕陞左副都御史欽此欽遵王恕猥以庸材濫膺重寄偶遇山賊之狂悖幸賴

天兵之勦除慚無調度之功遽荷陞遷之寵感

恩莫旣揣分奚堪願傾葵藿之誠敢效涓埃之報除望

闕謝

恩外謹具奏聞

巡撫河南

區畫未完稅糧奏狀

行據河南布政司呈送造完天順八年以

前未完稅糧文冊到院看得冊內起運京倉等處未完者少存留各府州縣未完者多伏覩成化元年十一月二十七日節該欽奉

詔書內一款各處軍民解納糧草農桑人丁絲絹門攤商稅戶口食鹽米鈔并諸色課程除已到倉庫上納外有納欠年久追陪未完者自成化元年十一月以前悉皆宥免欽此除欽遵外今照前項拖欠天順八年以前各

年稅糧除起運京倉等處另行外其存留  
未完之數中間雖有已經起解被里甲大  
戶侵欺者亦有輕收輕齎到於臨倉糴買  
攬頭誑騙不能完納者亦有逃亡死絕人  
戶遺下之數里甲陪贖不起因被上司催  
併緊急捏作徵完虛文起解者亦有交被  
水旱災傷申告後時不蒙准理仍前催徵  
不會上納者亦有責令細戶自行送納不  
曾到倉者求其拖欠之故雖不同大抵皆

是納欠年久追陪未完之數遵依前項  
詔書事例俱該宥免但緣有司惟恐倉廩匱乏  
供費不足又恐下人作弊將已徵錢糧捏  
作未徵希冀蠲免以此一槩不與分豁節  
次行文催併去訖切謂前項稅糧若是里  
甲大戶侵欺雖今典田賣地陪贖完納亦  
不爲過果係小民拖欠例該宥免者若猶  
追徵非惟逼迫人難實是孤負  
恩典况河南地方連年災傷人民艱窘原經收

人戶有名無實家道消乏者多雖稱在前  
侵欺糧價年久亦皆費用不存若仍追徵  
本色縱使傾財破產鬻男賣女亦恐陪納  
不起兼且本布政司官庫銀兩盡數送赴  
荆襄軍前給賞軍士卽今無他儲積非惟  
買辦等項缺價支給萬一有緊急之用實  
難措置若不設法從宜處置錢糧殆難完  
結官司徒自紛擾如蒙乞

勅該部計議合無行移河南布按二司各委堂

上公正官員會同前去所屬欠糧府州縣  
督同各該官吏從公審勘天順八年以前  
各年存留稅糧除已納完外未納之數果  
係徵收在官已經起解被里甲大戶侵欺  
者照例每糧一石折收銀二錢五分煎銷  
成錠解赴本布政司上納收貯以備支用  
若是小民拖欠者俱照欽奉

詔書內事理宥免如布按二司委官不行用心  
查勘縱容下人通同作弊許巡按監察御



史叅奏拏問如此庶幾錢糧明白而小民得霑

恩惠庫藏贏餘而緩急不致悞用緣係委官查勘未完稅糧折納銀兩事理未敢擅便成化三年四月十五日具題

蝗生境內請避位因勸 上去奢崇儉

奏狀

據開封彰德衛輝等府睢鄭等州滎澤陽武尉氏通許杞縣祥符儀封河陰新鄭陳

留長葛蘭陽臨漳安陽新鄉等縣申各准委官判官等官王憲等牒成化三年六月內巡視得恒山等里地方間有飛蝗過落及蟲蝻生發食傷禾稼督令火甲人等打捕移牒轉達等因到職行間又據河南布政司并河南按察司分巡河北道僉事王霽亦呈前因案照先據衛輝等府備胙城等縣申稱蝗蝻生發已經具題及通行都布按三司原委分巡分守叅政等官王高

五公奏稿卷  
分投前去督屬委官設法打捕去後今據  
前因除嚴督原委官員打捕另行外臣切  
惟蝗蝻生發固雖天災實關人事人事修  
則天意可回而災不爲災矣昔卓茂今密  
邑而蝗不入境茂能修其職也今蝗蝻爲  
患於河南者豈無故乎良由臣巡撫失職  
不能敷宣

聖化以安民人是致上天以此而譴告耳况臣  
管內地方連年水旱加以去歲荆襄盜起  
軍勞於征調民困於轉輸及又今年起運  
稅糧并勘合買辦物料等件比之往年數  
多今又遭此蝗蝻之災軍民何以聊生考  
之於史宋真宗罷諸營建而飛蝗盡絕此  
真宗能修德政以應天是以天災隨之而  
消也伏望

陛下以

天戒爲可畏以地方爲當重將臣罷歸田里另  
選賢能代理其事尤望

五公奏稿卷一  
聖  
陛下去奢崇儉除祭祀軍需之外其餘一應不急之務無益之事可減省者減省之可停止者停止之使財不妄費民困少紓庶幾天意可回而災沴可弭矣臣受

國重寄值茲災異不敢循默爲此具題  
激勸賢能奏狀

節該欽奉

勅諭今特命爾巡撫河南地方官吏有能奉公守法修舉政務者量加獎勸欽此欽遵及節

該欽奉

詔書內一款府州縣官有廉能公正撫字勤勞深得民心者上司以理相待仍具其政蹟奏聞以憑旌擢欽此欽遵除河南布政司所屬州縣見任廉能知州謝光知縣尚璣王璽胡澄先該巡撫都御史賈銓奏

請旌異不開外今體得開封府中牟縣知縣王敷商水縣知縣羅楫河南府孟津縣知縣丁政新安縣知縣魏恭俱各廉能公正撫

字勤勞深得民心未經旌擢除欽遵

詔書內事理以禮相待外如蒙乞

勅吏部將各官照例量加旌擢庶使廉能者益  
加勸勉不才者有所感發緣係激勸官員  
事理未敢擅便今將各官略節政蹟開坐  
具本謹題

開封府

中牟縣知縣王敷 處事公勤持身  
廉介耄倪感德遠近知名

商水縣知縣羅楫 不剛不柔無私  
無僞令行禁止事安民安

河南府

孟津縣知縣丁政 操持端謹政令  
公平庶事康哉群黎樂只  
新安縣知縣魏恭 外無浮華中則  
純確令嚴政善吏畏民懷

代書辦吏賈儀等請冠帶奏狀

臣先任右副都御史奉

勅諭撫治南陽襄陽荊州三府流民彼因缺人  
書辦行該吏部題

准撥令史賈儀典史陸嵩跟隨書辦後因荆襄  
盜賊節次奉

勅命臣公同太監尚書總兵等官唐慎等計議  
征勦師出數月賊寇殄滅地方底寧伏蒙  
聖恩念臣前項微勞陞臣左副都御史緣令典  
賈儀陸嵩一向隨臣在於軍前書辦公文  
催糧督軍蹈危履險同受辛苦未霑

天恩况各吏係是吏部考中例該歷俸三年滿  
日冠帶正八品出身人數今已歷俸三十  
箇月止有六箇月未滿照得提督軍務白  
圭帶去令史陳廉總兵官撫寧侯朱永帶  
去掾史黃宣和等俱未及三年已蒙冠帶  
今賈儀等與各吏事體相同如蒙乞

勅吏部照例令各吏冠帶辦事挨次取用如是  
則勤勞者知所感激而益樂於効力矣緣  
係激勸事理未敢擅便具題

言吏部不覆請給 誥命未當奏狀

臣因父年老於成化三年九月初二日具奏乞

請

誥命奏奉

聖旨吏部知道欽此太醫院使施安院判方賢各為母老於本月初三日具奏乞

請

誥勅亦奉

聖旨吏部知道欽此該部已與施安方賢覆奏奉

聖旨准他却不肯與臣覆奏以致臣不蒙

恩典切思臣與施安方賢同為在京堂上官同為親請給

誥勅而該部與施安方賢覆奏不與臣覆奏非惟不遂臣之私情實於事體未宜伏望

皇上憐臣親老一視同仁特

勅吏部照依施安方賢事例以臣應得

誥命先行給賜使臣父生被光榮非惟臣感恩於無窮而天下之爲臣子者皆知所勸矣臣爲親之心激切干冒

天威不勝戰慄之至爲此成化三年九月十三

日具題

陞南京刑部左侍郎謝恩奏狀

臣先任都察院左副都御史

欽差巡撫河南近准吏部咨

欽陞前職臣猥以庸材屢蒙顯擢備員兩省殊

無異政持憲二年未有奇勲方虞物議之

未平詎料

宸衷之不棄特降

綸音於

北闕俾弼邦教於南京

寵命非常驚懷失次臣敢不公忠是勉敬慎自

持遵賢哲得情勿喜之言體

聖明視民如傷之意庶裨無爲之至治少酬

莫大之

洪恩臣下情無任除望

闕謝

恩前去到任外具題

王公奏稿卷之一